



2015-imut aningaasanut inatsisissatut siunnersuut.

(Aningaasaqarnermut Aatsitassanullu Naalakkersuisoq)

Aappassaaneerneqarnera

Aningaasanut inatsisissatut siunnersuutip siullermeerneqarnerani Partii Naleqqamiit oqaaseqaativut innersuussutigalugit suliap aappassaaneerneqarnerani imannak oqaaseqaateqassuugut.

Partii Naleqqamiit maluginiarparput aningaasanut inatsisip aappassaaneerneqarnissaanut ataatsimiititaliap Naalakkersuisut akissutaat naammassillugit tamaasa suliarisinnaasimanngikkai piffissakilliorneq pissutigalugu, taamaammallu suliap pingajussaaneerneqarnissaanut kinguartittariaqarsimallugit.

Taamaammat Partii Naleqqamiit piumasaqaatigaarput suliassat inuaqatigiinnut taama pingaaruteqartigisut sukumiisumik peqqissaartumillu suliarineqarnissaannut piffissaliunneqartut suliamut naapertuuttumik sivisussusilerneqartarnissaat siulittaasoqarfimmii eqquumaffiginerusariaqartut aamma Partiinut piffissaliunneqartut ilanngullugit.

Aningaasanut inatsisissatut siunnersuutip maannamut suliarineqarnerani Partii Naleqqamiit oqaatigisariaqarparput Aningaasaqarnermut Naalakkersuisoq marloriarlugu ataatsimeeqatigisarsimagatsigu, kisianni ataatsimeeqatigiittarnerni Naalakkersuisumii Naalakkersuinikkut anguniakkatsinnik qanillattuisinnaaneq ajoraluwartumik maannamut naammaginartutut oqaatigineqarsinnaanngilaq.

Taamaammallu aamma suleqatigiinnerunissamik oqalunneq annerusumik timitaqanngitsoq tassuuna takuinnarsinnaavarput.

Tassami inuussutissarsiornerup siuarsarneqarnissaanut iliuuserineqarsinnaasut maannamut malunnaatilimmik pissutsinullu piviusunut naapertuuttumik takussutissaqanngillat, illuatungaatigulli aaqqissusseqqinniarnerit inuaqatigiinni pissakinnerpaaniit aallerfiginiarneqarput.

Tassami utoqqaat ukiuni tulliuttuni 100 million koruuninik sipaarniarfigineqartussaapput, siusinaartumik sulisinnaajunnaarnersiutillit 40 million koruuninik sipaarniarfigineqartussaapput, aalisartut ukiuni tulliuttuni 50 million koruuninik aallerfiginiarneqarput, taakkua saniatigut aalisariutinik pisoqalisunik isaterinissamut aningaasaliissutit 20 million koruunit peerneqarnissaat siunnersuutigineqarpoq.

Sanaartornermut aningaasaliissutit 130 million koruuninik appartinniarneqarnerat suliffissaaleqinerujussuup apparsarniarneqarneranut naapertuitinngilaq.

Kiisalu suliffissaaleqinerup akiorniarneqarnissaanut aningaasaliissutit 24,9 million koruunit 2016-imiit sipaarniarneqarput.

Ilaqtariinnut pissakinnerusunut inigisaminniit anisitaasimasunut aammalu anisitaanissaminnut erumasorpassuarnut iliuusissamik takussutissiisoqanngilaq. Naak Naalakkersuisut Siulittaasuata takusinnaalluarluaraa inuiaqatigiinni katatavut taama amerlatigisut.

Taamaammat inuiaqatigiit akornani inupassuit uninngatinneqarput. Aalisarusukkaluartut, piniarnermik inuussutissarsiorusukkaluartut, allagartassaminnik arsaartorneqartut, allagartanik tunineqarsinnaanngitsut, naak ullormiit ullormut inupassuit aalisarnikkut piniarnikkullu imminnut napatisinnaagaluartut susinnaajunnaarsitaapput.

Illua-tungaatigut takornariartaatinik umiarsuaatilissuit 8 million koruuninik oqilisaaffigineqarniarput suliffeqarfiallu 90 million koruuninik oqilisaaffiginiarneqarput.

Naatsumik oqaatigalugu inuit ilaqtariillu pissakinnerusut aallerniarfigineqarput pisuullu suli annerusumik oqilisaaffiginiarneqarlutik.

Pissutsit taamaannerat soorunami Partii Naleqqamiit akuersaarsinnaanngilluinnarparput.

Suliap aappassaaneerneqarnerani allannguutissatut siunnersuutit 142-t Naalakkersuisuniit saqqummiunneqarput, taakkunannga arfineq-marluk oqaasertaliussanut allannguutissatut siunnersuutaallutik.

Naliginnaasumik allaffissornikkut sipaarniutit, soorlu assersuutigalugu avataaneersunik siunnersortinik atuinerit il.il. innuttaasunut ulluinnarni malunnaateqartussaanngitsut taakku sipaarniarfigineqarneri akuersaarpavut.

Kisianni erseqqissarusupparput Peqqinnissaqarfiup iluani Qasigiannguit, Qaanaap, Ittoqqortoormiillu nakorsaqarnikkut sullinneqarnerisa sipaarniarfigineqarnissaanik siunnersuutit akuersaarsinnaanngilluinnaratsigit.

Peqqinnissaqarfiup iluani pikkorissarnernut ilinniartitseqqittarernullu sipaarniarnerit akuerinngilavut aammalu kigutilerinermut sipaarniutiginiarneqartut ilanngullugit.

Meeqqanut inuuusuttunullu sammisassaqtitsinernut tunngasut sipaarniarfigineqarnissaanik siunnersuutit akuersaanngilagut.

Kiisalu ilinniartitaanerup iluani aamma sipaarniutigineqartut assigiingitsut isumaqatiginngilagut, taamaattumik naatsumik oqaatigalugu sipaarniutissatut siunnersuutit maani innuttaasunut sunniuteqapilussinnaasut akuersaanngilagut.

Aaqqissusseqqinnermik taallugu Naalakkersuisuniit siusinaartumik sulisinnaajunnaarnersiutilinnut utoqqarnullu tunngasut siulliullugit aallerfiginiarneqarnerat akuersaanngilarput.

Allannguutissatut siunnersuutit 16-inik Sammisami siullermi – kisitsisinik iluarsiinernut, kukkunernillu iluarsiinertut ataatsimiitaliamit oqaatigineqarpoq, taakkulu IST-mut sunniuteqassanngitsut aamma oqaatigineqarluni, kisiannilu taakku iluanni allannguutissatut siunnersuut nr. 13-imut tunngatillugu paasissutissat annertunerusut ataatsimiititalimit piumasarineqarsimasut qanoq akissuteqarfigineqarsimanersut paaseqqaarusupparput?

Allannguutissatut siunnersuutit 25-it Sammisaq 2-mut tunngatillugu taakku missingersuutinut sunniuteqassanngitsut oqaatigineqarpoq, kisiannili IST-mi angusassanut 15 million koruunit pitsangortissagaat oqaatigineqarluni.

Soorunami Partii Naleqqamiit aamma soqtigaarpot allannguutissatut siunnersuutit missingersuutinut sunniuteqassanngikkaluarpataluunniit aningaasaliissutit assigiinngitsut konto-miit konto-mut nuussinerit qanoq iluseqarnersut paassisallugit.

Sammisaq 2-mut tunngatillgu allannguutissatut siunnersuutit nr. 17 aammalu 18 annertunerusumik nassuaasoqarnissaa ataatsimiititaliamit kissaatigineqarpoq.

Allannguutissatut siunnersuutit nr. 17-41-mut kinguartinneqarnissaat ataatsimiititaliamit piumasaqaatigineqarluni.

Sammisat assigiinngitsut qulit eqqartorneqarput, kisianni taasissutissani assigiinngitsuni ataatsimiititaliap isumaliutissiissumminni allannguutissatut siunnersuutit assigiinngitsut akuersissutigineqarnissaa inassutigineqarpoq.

Taakkununnga tunngatillugu Partii Naleqqamiit erseqqissassuarput allaffissornikkut sipaarniutissat oqareernitsituut akuersaarsinnaagatsigit, kisiannili allannguutissatut siunnersuuterpassuit ilaat innuttaasunut sunniuteqapilussinnaasut akuersaarsinnaannginnatsigit, aammalu Aningaasaqarnermut Naalakkersuisumik ataatsimeeqateqartalarluarnitsinni pissakinnernut suliffissaaleqisunullu aaqqiiniutigineqarsinnaasunik tikkuussisoqanngilaq.

Illua-tungaatigulli innuttasuni inissismalluarnerpaat, pilersaarutit akisoorsuit, takornarissat il.il. pitsaanerusunik atugassaqartinnissaat Naalakkersuisuniit pingartinneqarnerupput.

Taamaattumik maannakkuugallartoq Partii Naleqqamiit allannguutissatut siunnersuutit taama isikkoqartillugit akuersaarsinnaannginnatsigit.

Taamaattumik suliap pingajussaanerneqarnissaanut Partii Naleqqamiit piumasaqaatigaarpuit Naalakkersuisut inunnik ataasiakkaanik katataanitsinnik unitsitsinissamut suliniutinik saqqummiussaqarumaartut.

Taamaaliornissamut Partii Naleqqamiit suleqataanissamut piareersimavugut aammalu taamaaliortoqassappat akisussaaqataanissatsinnut piareersimavugut.

Taama Partii Naleqqamiit oqaaseqarluta suliap pingajussaanerneqannginnerani aningaasaqarnermut akileraartarnermullu ataatsimiititaliami suliareqqinnejarnissaa inassutigaarpuit.

Qujanaq.